

Caso di abuso sexual ayera den Corte

ORANJESTAD – Ayera mainta Corte den Prome Instancia ta trata e caso penal cu Ministerio Publico a cuminsa contra e persona V. Ta trata aki di un caso di abuso sexual cu a sosode aña pasa.

Casonan di abuso sexual ta alarmante na Aruba. Ta practicamente tur luna tin por lo menos un caso di abuso sexual den Corte.

Mas y mas ta saliendo na cla cu hopi mucha ta birando victima di abuso sexual den famia mes. Recientemente a publica un lamentabel caso caminda mucha menor di edad a bay abusa di otro mucha menor di edad.

Esaki ta lamentabel pero tabata algo cu constantemente Hues ta adverti den Corte. Hopi biaha e victima di abuso sexual, ta keda afecta y no

ta haya e asistencia debido y esey ta causa cu e victima ta keda cu un trauma. E trauma aki por afecta e victima di tal manera cu e victima ta haya un rabia riba sea hende homber of hende muhe y tin miedo pa tin relacion.

Tin di e victimanan, manera ta e caso cu e mucha menor di edad, ta bay haci mesun cos cu otro of otro. Ta parce cu e ta sea algo cu nan a tuma como custumber of ta un rabia cu nan ta tuma venganza riba dje di e forma aki.

Ta hopi tristo ora scucha kico tur ta sosode. Prensa tin un tarea sumamente importante den esaki pa informa y alerta comunidad. P'esey tin palabracionnan concreto haci cu Corte di Husticia caminda no ta publica nomber di e victima.

Motibo pa esaki ta cu Aruba



ta un comunidad chikito y facil lo haya sa ken e victima ta. Den e palabracion cu prensa a haci cu Corte di Husticia hopi aña pasa, un di e puntonan cu di parti di prensa a trece padilanti, no ta importante pa sa ken e victima ta. Importante ta pa informa con un mucha menor di edad a wordo abusa y kico mayornan mester paga bon

tino cun'e. Den pasado Bon Dia Aruba a yega di haci un entrevista cu un ex Hues Comisario, kende a señala cu riba di 90 % di e casonan di inmoralidad, ta sosode den famia mes. E informacion aki a shock comunidad. Na Aruba nos tin e custumber di nos grandinan. Esey kiermen, problemanan den famia, mester keda den

famia pa otro nan no haya sa y haci esaki un redashi.

Esey tabata e motibo tambe cu departamento KZP, cu ta atende cu casonan di abuso sexual, no tabata haya hopi denuncia. Ademas, casonan di inmoralidad y abuso sexual tabata wordo trata cu portanan cera.

Despues di a yega na e palabracion y prensa a cuminsa publica casonan, hopi famianan a dicidi di haci denuncia y awor tin mas o menos un bista di e cantidad di casonan cu ta sosode. Pa motibo cu e casonan aki hopi biaha ta den famia, door di denuncia, e famianan ta rabia cu otro cual ta di lamenta. Tin casonan hopi lamentabel caminda tata ta abusa di su propio yiu. Awe Bon Dia Aruba lo publica con e caso di ariba menciona ta y kico Fiscal ta pensa di e caso. □